



Inatsisartut

**Ilaqutariinnermut Peqqissutsimullu Ataatsimiititaliaq**

Att.: Tillie Martinussen, Ataatsimiititaliaq siulittaasua

20-05-2016  
Suliap nr. 2016-687  
Dokument nr. 2809644  
Inatsilerinnermut  
immikkoortortaqarfik  
Postboks 260  
3900 Nuuk  
Tlf. (+299) 34 50 00  
Fax (+299) 34 66 66  
E-mail: iian@nanoq.gl  
www.naalakkersuisut.gl

**Tallimangornermi ulloq 20. maj 2016, nal. 16.00-16.45  
ataatsimiittarfik 2-mi Ilaqutariinnermut Peqqissutsimullu  
Ataatsimiititaliaq siunersiuinissaanut aggeqqusissut**

**Atorunnaarallartitsinermi tunngaviit sukumiinerusut atorunnaarallartitsinerullu imarisaa.**

Kommuni pisussaaffimminik innuttaasulluunniit pisinnaatitaaffiinik annertuumik sumiginnaasimappat kommunip isumaginninnikkut maleruaqqusanik ingerlatsinerat § 7a naapertorlugu Naalakkersuisut atorunnaarallartitsinissamik aalajangersinnaasut ataatsimiititaliaq maluginiarpaa.

***Aalajangersakkamut oqaaseqaatinik suliaqartoqarsimavoq, taamaakkaluartoq atorunnaarallartitsinissaq qaqugukkut pisarnissaa atorunnaarallartitsinerullu qanoq ingerlanneqarnissaanik eqqarsaatersortoqarnersoq itisileerlugillu erseqqissaanissannik qinnuigineqarputit. Matumani piffissaq kommuninilu sulisunut tunngasut eqqarsaatigalugit aammalu kommunimi/kommuninikommunip pisussaaffiitut innuttaasullu pisinnaatitaaffiitut aporaattoqannginnissaa siunertaralugu nukiit atorneqartussatut eqqarsaatigineqartut eqqarsaatigalugit. Atorunnaarallartitsinerup ingerlanissaanut eqqarsaatit matuma ataani allaaserineqarnissaa ataatsimiititaliaq kissaatigaa.***

**Akissut**

Isumaginnittoqarfimmi najugarisami ingerlatsiveqarfimmi annertuumik sumiginnaasoaqartillugu atorunnaarallartitsineq immikkut pisoqartillugu aalajangersakkatut eqqarsaatigineqarpoq, qitiusumik aqutsisoqarfimmiit

akuliuttoqarnissaa pisariaqalersimappat, innuttaasut inatsisitigut isumannaatsuunissaat imaluunniit aaqqissuussaanerup – tassa system-ip inatsisitigut akuerisaasumik ingerlanissaa eqqarsaatigalugu.

Assersuutitut uku eqqarsaatigineqarsinnaapput:

- Borgmesteri imaluunniit kommunaldirektøri naalackersuisoqarfimmut saaffiginnippoq ilisimatitsissutigalugulu kommunip isumaginninnikkut ingerlatsiveqarfia annertuumik ajornartorsiuteqartoq aammalu kommunip isumaginninnikkut suliassani piffissami saaffiginnissummi pineqartumi kivissinnaassanngikkaa.
- Nakkutilliisutut immikkoortorta q imaluunniit siunnersuisartutut immikkoortorta q inatsisitigut annertuumik unioqqutitsisoqartoq paasisaqarpoq, assersuutigalugu najugarisami isumaginnittoqarfiup aqutsisuanit annertuumik ukiunilu arlaqartuni ingerlatsinikkut sumiginnaasqartoqarsimanera aaqqiivigineqarsimanngitsoq paasineqarluni, aammalu immaqa najugarisami sullarluttoqarnera imaluunniit isumaginninnikkut inatsisinik amigaateqartumik aqutsisoqarsimanera isumaginninnikkut aqutsisoqarfimmi nalinginnaasumik akuersaaginnarneqalersimalluni.

Atorunnaarallartitsinerup qanorpiaq iluseqarluni ingerlanneqartarnissaa takussutissioruminaappoq. Atorunnaarallartitsinerup malittarisassa q immikkuullarissunik pisoqarnerani taamaallaat atorineqartassaaq, tassa pisuni assigineqanngitsuni aamma pisuni suliassanut ataasiakkaaq qissaartuni. Taamaalilluni atorunnaarallartitsinerup nalinginnaasumik qanoq ingerlanneqartarnissaanik takussutissiaateqartoqanngilaq.

Atorunnaarallartitsisoqarnissaa sioqqullugu suleriaaserineqartussaq ilimagineqartoq ima iluseqarsinnaavoq:

#### **Atorunnaarallartitsineq sioqqullugu**

- 1) Isumaginninnikkut inatsisini annertuumik unioqqutitsisoqartoq Naalackersuisoqarfik paasisaqarpoq
- 2) Kommuni siunnersorneqassasoq aamma/imaluunniit nakkutigineqassasoq Naalackersuisoqarfik naliliisimavoq
- 3) Kommunit Nakkutilliisoqarfiat ilisimatinneqassanersoq Naalackersuisoqarfik naliliisimavoq
- 4) Pisuni immikkuullarissuni atorunnaarallartitsinissa q pisariaqalersinnaanersoq Naalackersuisoqarfik naliliisimavoq, kingornalu
- 5) ajornartorsiut (atorunnaarallartitsinissarlun) pillugu Naalackersuisoqarfiup Naalackersuisumut akisussaasumut saaffiginnissutigineqarpoq, imaappallu

- 6) Naalakkersuisup pissutsit ima najummatsernartigisutut isigippagit atorunnaarallartitsinissaq pisariaqartinneqartutut isigineqarluni, taava kommunalbestyrelsiminngaaniit oqaaseqaammik piniartoqassaaq
- 6a) Kommunimiit oqaaseqaatini tiguneqartuni paasissutissat pissusiviusunut kukkussuteqarsimasut paasinarsitippassuk atorunnaarallartitsinissamut aalajangiineq nalilersoqqinneqassaaq. Taamaattoqangippat Naalakkersuisoqarfik ima iliuuseqassaaq:
- 7) Atorunnaarallartitsinissamut akuersissuteqartoqarnissaa kissaatigalugu Naalakkersuisoqarfik Naalakkersuisut isummernissaannut tunngavissiusaaq

#### **Atorunnaarallartitsineq**

Naalakkersuisut isummernissaannut tunngavissiaq Naalakkersuisut akuersaarpassuk ima iliortoqassaaq:

- 8) Atorunnaarallartitsineq aallartinneqassaaq, Kommunillu Nakkutilliisoqarfiat ilutigisaanik ilisimatinneqassaaq, aamma
- 9) Suliaq pillugu kommunalbestyrelsimik oqaloqatigiinnerit aallartissapput, Naalakkersuisoqarfiullu immikkoortortaasa aammalu ingerlatsiviit iluini nukiit pioreersut atorlugit atorunnaarallartitsineq aallartinneqassaaq piareersarneqarlunilu.

*Kommunini allaffissornikkut pisariaqartitsinerup Naalakkersuisut kivitsinissaat eqqarsaatigalugu Naalakkersuisut nukinnik suminngaanniit pissarsissappat matumani pingaartumik atorunnaarallartitsinerup ingerlanerani?*

*Sulisoqarnikkut innersuussinissamillu periarfissat eqqarsaatigalugit.*

*Tamatumunnga tatillugu erseqqissaatigineqassaaq siunnersuut namminer mi isumaginninnikkut suliaasaqarfimmi nukissanik annertunerusumik pissarsiviusinnaanera isumaqarfigineqanngimmat, kommuniniuppat Naalakkersusuniikkaluarpalluunniit.*

#### **Akissut**

Kommunimi ingerlatsivimmi innuttaasut isumaginninnikkut pisinnaatitaaffiink annertuumik sumiginnaasoqartillugu ilaannakortumik tamakkiisumilluunniit kommunip ingerlatsiviani isumaginninnikkut malittarisassanik atorunnaarallartitsineq pisariaqartutut aamma akisussaassuseqartumik pissutsini immikkuullareqqissaartuni taamaallaat sakkussaasoq naqissuserneqartariaqarpoq, kikkunnilluunniit atorneqarnissaanik kissaatiginartinneqanngitsaq.

Apeqquut politikikkut allaffissornikkullu Naalakkersuisoqarfimmi oqaluuserineqarsimavoq, oqaluuserineqarneranilu minnerunngitsumik

anigaasaqarnikkut nukissatigullu attuumassuteqartut qanoq annertutigisumik nammakkorsorneqarsinnaanersut piviusorsioortumik ukkatarineqarsimallutik. Isumaqtigiissutigineqarpoq anigaasaqarnikkut kingunerisassat piffissami atorunnaarallartitsinermi najugarisami ingerlatsivimmi atorunnaarallartitsinerup timitalerneqannginneranili suliarineqarsimasussaagaluartut taamaalillunilu Naalakkersuisoqarfimmi qitiusumik isumaginninnikkut suliassat pisariaqartumik naammassineqartariaqarnerini aningaasartuutaasut kommuninut ataatsimoorussanik aningaasaliissutaasartuni pioreersuni ilaareertut oqaatigisariaqarluni, taamaalillunilu aamma kommuninut anigaasaqarnikkut nammakkeeqqinnermik kinguneqartariaqaratik. Tamanna kommuninut aamma allaffissornikkut nammakkersuutaanaviangilaq, kisiannili atorunnaarallartitsineq Naalakkersuisoqarfimmut suliassanik nutaanik kivittariaqakkanik malitseqassaaq, tassami atorunnaarallartitsinerup nalaani naalakkersuisoqarfittut ingerlatsinermi imiikkoortortat ilaanni suliassat nalinginnaasuni sulisorisat peqartassanngimmata. Taamaattoq nalilernerqarpoq suliassat pitsaasumik agguarneqarnerisigut allanullu suliassiissutigineqarnerisigut atorunnaarallartitsinerup nalaani ingerlatsinermi suliassat nukinginnartuunngitsut pingaarnersiunerimi tunulliukkallarnerisigut sunniutissat killilersimaartinneqarsinnaasut. Assersuutitut taaneqarsinnaapput innuttaasunut paasititsiniaanerit imaluunniit immikkut sammisaqartunik isumasiuinerit imaluunniit pikkorissaanerit allaanerusumik piareersarneqartassasut, sapaatit akunnerini imaluunniit qaammatini arlalialunni kinguartinneqarlutik, ajornerpaamillu pisoqartillugu sivikinnerusumik unitsinneqarallartassasut, taamaattorli soorunami nanginneqartarumaarlutik.

***Kommunit isumaginninnikkut malittarisassanik isumaginninnerinut nakkutilliinerup nukittorsarneqarnissaa qanoq pisariaqartiginersoq isumaqarpit aammalu kommunit pisussaaffiisa innuttaasullu pisinnaatitaaffiisa eqqortinneqarnissaata qulakkeerinissaa siunertarlugu isumaginninnikkut suliassaqarfimmut tunngatillugu Naalakkersuisut kommunillu suleqatigiinnerisa nukittorsarneqarnissaanut periusissiamik anguniakkanillu qanoq annertutigisumik suliaqarpit??***

#### **Akissut**

Nakkutilliinermik ingerlatsivimmik nutaamik pilersitsisoqarneratigut piffissaq tamakkerlugu sulisoqartunik ulluinnarnilu pisortaqartumik tamakkiisumillu nakkutiginninnissamik taamaallaat suliaqartussamik isumaginnittoqarfimmi ingerlatsinermi nakkutilliineq aamma ulloq unnuarlu angerlarsimaffinni nakkutilliineq malunnaateqarluartumik nukittorsarneqareerpoq. Taamattaq qitiusumik siunnersuisarfimmik pilersitsisoqareerpoq, kommunini meeqqat isumagineqarneranni sullissinermi pikkorissutsikkut ilapittuutaasussamik, taamaalillunilu kommunini sullissinerup pitsaassusaanik ingerlaavartumik

qaffassaasoqarneranik kinguneqartussamik. Taamaattoq nakkutilliisoqarnerup tungaatigut sulii annertunerusumik nukittorsaasoqarsinnaavoq. Tassami isumaginnittoqarnikkut nalunaarutiginnittoqartillugu aamma paasissutissanik allanik attuumassuteqartunik pingaaruteqartunik piffissaagallartillugu Naalakkersuisoqarfiup pissarsisinaanera ullumikkut unammillernartut sulii naammassineqanngitsut ilagivaat. Tamatumani assersuutaasinnaapput meeqqat angerlarsimaffiup avataanut inissinneqartartut pillugit paasissutissat aamma sullitassat allanut tunngatillugu paasissutissat - eqqoqqissaartut tutsuiginartullu. Taamaattumik meeqqanut ikiorsiisarnissaq pillugu 2016-imi ukiaanerani inatsisissatut siunnersuummik saqqummiussaqaassaanga, ilaatigut nakkutilliinerup aamma siunnersuisartutut immikkoortortap kommuniniit paasissutissanik pisinnaaneriniq nukittorsarneqarnissaanik imaqartumik aammalu nuna tamakkerlugu nalunaarutiginneriaatsimik nutaamik pilersitsinissaq eqqarsaatigalugu, tamatuma kingorna nalunaaruteqartoqartillugu kommunit nalunaarutiniq tigusaminnik qitiusumut nalunaarutiginnittalersissallugit meeqqanik sumiginnaasoqartillugu Naalakkersuisoqarfiup nakkutilliivianit nalunaarutiginninnerit tamakku tamakkiisumik nalunaarsorneqarsinnaaqqullugit aammalu kommuninut nakkutilliartorluni angalasarnerni nakkutilliivimmit malitseqartitsinermit atornerqarsinnaasunngortillugit.

Inussiarnersumik inuulluaqqusillunga



Martha Lund Olsen